

PAGTULON-AN 13 – SI JOSUE NANGULO SA ISRAEL PAGSULOD SA YUTANG GISAAD

Josue 1 - 11

TEMA: Pagpakita nga ang pagpanag-iya sa mga panalangin sa Dios nagadepende sa pagkupot sa mga saad sa Dios diha sa Iyang Pulong.

Uban sa atong mga espada ug mga taming kita magapakig-away sa daghang mga gubat sa magapanaw kita sa DALAN SA SAAD. Imong makat-onan ang sekreto unsaon sa pagkuha ug pagpahimulos sa mga panalangin sa kinabuhing Cristohanon.

Si Moises, ang matinumnon nga alagad sa Dios, namatay ug siya gilubong sa Dios, Deuteronomio 34:5-6. Usa ka bag-ong pangulo, si Josue, gipili aron magapangulo sa Israel ngadto sa YUTANG GISAAD. Si Josue nagapakita sa iyang pagtoo didto sa Kadesh sa diha nga ang mga dili matinoohon nga mga maniniid nangahadlok pagsulod ngadto sa yuta. Sulod sakwarenta (40) katuig nga paglatagaw nila sa kamingawan, ang mga tigulang sa Israel nangamatay na (gawas kang Caleb ug Josue) ug si Josue mao na ang magapangulo sa mga bag-ong kaliwatan aron sa pag-angkon sa yuta. Ang Dios nagapakigsulti kang Josue ug naghimog mga saad ngadto kaniya:

- “Ang tanang dapit nga pagatumban sa lapalapa sa inyong tiil kana igahatag Ko kaninyo sumala sa gipamulong Ko kang Moises.” Josue 1:3.


- “.... Ingon nga Ako nag-uban kang Moises, mao man magauban Ako kanimo; ikaw dili Ko kawangon, ni biyaan Ko ikaw.” Josue 1:5.

- “Magmakusganon ka lamang ug magmaisug gayud, sa pag-atiman sa pagbuhat sumala sa tanang balaod nga gisugo kanimo ni Moises nga akong alagad; ayaw pagtipas ngadto sa tuo ni ngadto sa wala gikan niana, aron magmauswagon ka bisan asa ka paingon. Ayaw pag-ibulag kining basahon sa Kasugoan sa imong baba; hinonoa ang magpamalandong ka niana sa adlaw ug sa gabii, aron kamatngonan mo sa pagbuhat sumala sa gisulat niana; kay sa ingon niana ikaw magmauswagon sa imong panaw, ug unya makab-ot mo ang kauswagon. Wala Ko ba ikaw sugoa? Magmakusganon ka ug magmaisug; ayaw pagkahadlok ug dili ka magkaluya; kay si Jehova nga imong Dios, magauban kanimo bisan asa ka paingon.” Josue 1:7-9.

Ang kadaugan ni Josue nagadepende sa iyang pagtoo ug pagtuman sa basahon sa Kasugoan. Ang Israel miabut duol sa unang dakung lungsod sa Jerico. Si Josue nagpadala una sa duha ka maniniid. Ang duha ka maniniid miadto sa balay ni Rahab, kinsa giluwas nila gikan sa kamatayon. Misaad sila nga siya luwason kon ang lungsod ila na nga mailog.

Busa siya magahigot ug pulang pisi sa bintana diin sila gitunton paubos. Ang maong pisi mao ang gigamit sa ilang pagpahawa, Josue 2. Ang pisi nga pula didto sa bintana, naghulagway sa kaluwasan pinaagi sa giula nga dugo sa Ginoong Jesu-Cristo.

Sunod, ang Israel nangandam sa pagtabok sa suba sa Jordan atbang sa Jerico, uban sa mga sacerdote nga nagpas-an sa arka sa pakigsaad nga nag-una sa mga tawo. Sa diha nga ang mga tiil sa mga sacerdote nga nagdala sa arka natuslob sa tubig, ang mga tubig nga nag-agas paubos gikan sa itaas mihunong sa usa ka pundok. Ug ang mga tubig nga nag-agas paingon sa Arabah, ang Dagat nga Asin, hingpit nga naputol. Ug samtang ang tibuok Israel milatas sa suba ingon sa mamalang yuta, ang mga sacerdote nga nagdala sa arka sa pakigsaad ni Jehova, nagabarug sa mamalang yuta sa tunga sa suba sa Jordan, Josue 3:14-17. Unya sa ika unom (6) nga kapitulo sa Josue, ang Israel gihatagan ug pahimangno aron sa pag-ilog sa Jerico. Ang mga tawo sa gubat kinahanglan ilang tuyokan ang lungsod sa Jerico ka usa (1) sulod sa unom (6) ka adlaw. Sa ikapito (7) ka adlaw, ilang tuyokan ang lungsod sa ka pito (7) ka higayon, ug ang mga sacerdote magapatingog sa ilang mga trumpeta.



Tinubdan: Sweet Publishing – kini ilustrasyon lamang

Human sa pagkadungog sa tingog sa trumpeta, ang mga tawo mosiyagit sa makusog, ang pader sa lungsod matumpag.

Dili ba usa kana ka katingalahan nga paagi sa pagdaug sa gubat? Ang mga tawo sa Jerico nagabantay nga mahadlokon samtang ang mga Israelitas nagalakaw palibut sa lungsod nga walay tingogtingog. Gusto sa Dios nga kita makakat-on nga ang Iyang mga paagi dili pareha sa atong mga paagi. Gusto Niya nga kita mubuhay sa mga butang nga makadawat Siya sa himaya ug dili ang tawo. Mangutana kita sa atong kaugalingong pipila ka mga pangutana.

Unsa ang nakahimo sa paglumpag sa pader sa Jerico? Pagtoo sa Dios ug pagtuman sa Iyang mga sugo o pulong, Hebreohanon 11:30.

Unsa ang nakaluwas kang Rahab? Pagtoo sa Dios ug pagtuman sa Iyang Pulong sumala sa Iyang gisulti; pinaagi sa mga maniniid kinsa iyang gidawat sa kalinaw, Hebreohanon 11:31.

Unsa ang nakapahimo kang Josue nga madaugon? Pagtoo sa Dios, ang Iyang dili makita nga Kapitan. Siya nagapakita sa Iyang pagtoo pinaagi sa pagtuman sa mga sugo sa Iyang Kapitan. Ang basahon sa Kasugoan wala gayud mobiya sa Iyang baba. Siya misalig ug mituman sa Dios, bisan pa ang mga sugo murag talagsaon.

Unsa man ang magadala ug kadaugan kanato nga nagkinabuhi sa TUGPAHANAN SA GRASYA? Kita, mga magtotoo ni Cristo, aduna usab gubat nga atong atubangon ug usa ka 'yuta nga gisaad' sa magapanaw kita sa *DALAN SA KINABUHI*. Adunay mga butang nga atong ilhon mahitungod sa atong gubat:

1. Ang atong 'yutang gisaad' mao ang langitnong mga dapit diha kang Cristo, Efeso 1:3, 1:20 ug 2:6. Pinaagi sa pagtoo kita, mga magtotoo kang Cristo, dili na alang niining kalibutana karon o diha sa kahimtang sa pagkamasal-anon ug pagkamabinatukon. Kita giluwat na gikan sa espirituhanong kamatayon ug gihatagan na ug espirituhanong kinabuhi, aron maana kita diha kang Cristo Jesus diha sa langitnong mga dapit.
2. Ang atong mga kaaway mao ang mga punoan, mga kagamhanan, mga agalon niining mangitngit nga kalibutan, sa mga dautang espirituhanong panon diha sa mga dapit sa kalangitan, Efeso 6:12.
3. Ang atong kadaugan mahimo lamang pinaagi sa pagtoo diha sa Pulong sa atong Kapitan, ang nabanhaw nga si Ginoong Jesu-Cristo. Gihatag Niya ang maayong balita sa grasya sa Dios pinaagi kang apostol Pablo: "Si Cristo Jesus namatay alang sa atong mga kasal-anan sumala sa Kasulatan, ug Siya gilubong, ug Siya nabanhaw sa ika tulo (3) kaadlaw sumala sa Kasulatan." 1 Corinto 15:3-4.

Pinaagi sa pagsalig niining maong mensahe sa kamatuoran, kita maluwas gikan sa impiyerno. Atong mapakita ang atong pagtoo pinaagi sa pagtuman sa mga ginatudlo ni apostol Pablo. Kini moresulta sa bunga sa Balaang Espiritu: gugma, kalipay, kalinaw, pailub, pagkamapuanguhon ug uban pa, Galacia 5:22-23. Ang atong kaaway magapaningkamot aron dili kita makapahimulos niining mga butanga, apan kon kita, mubuhat sama kang Josue ug magtuman, ang Dios gayud magamatinumanon ug mohatag gayud niini kanato.

Makasusubo nga isulti, human sa gubat sa Jerico, wala gayud sa hingpit mailog sa Israel ang Canaan tungod sa wala nila pagtuman sa hingpit sa mga Pulong sa Dios. Sila nakasulod ra sa kadugayan, apan gibahin nila yuta sumala sa giingon sa Dios.

Luwas na ba ka karon? Kon mao, sama ka ni Rahab nga nagapuyo sa dapit nga gitagana sa kalaglagan. Apan mahimo kang maluwas pinaagi sa pagtoo sama kang Rahab. Imong mapakita ang imong pagtoo pinaagi sa pagsugid nga si Cristo imong Maluluwas. Unya madala usab nimo ang ubang kauban nimo sa pamilya ngadto sa dapit nga luwas diha kang Cristo maingon man nga nadala ni Rahab ang iyang pamilya ug naluwas sila sa kalaglagan. Unsaon man? Pinaagi sa pagsulti kanila sa maayong balita sa grasya sa Dios.

SAG-ULOHON NGA BERSIKULO: “Wala Ko ba ikaw sugoa? Magmakusganon ka ug magmaisug: ayaw pagkahadlok ug dili ka magmaluya; kay si Jehova nga imong Dios, magauban kanimo bisan asa ikaw paingon.” Josue 1:9.

PAGTULON-AN 13 – BULOHATON

Direksyon: Isulat ang hustong tubag sa mga pamahayag o pangutana.

1. Kinsa ang nahimong pangulo sa Israel human sa kamatayon ni Moises?
Josue 1:1-2. _____.
2. Ngano nga siya man ang gitudlo? Deut. 34:9 _____

_____.
3. Unsa ang tulo ka mga pinasahi nga mga saad sa Dios kang Josue?
Josue1:3 _____;
Josue1:5 _____;
Josue 1:8 _____

_____.

Pilia ang hustong pulong aron makumpleto ang mosunod nga mga pahayag:

4. Ang kadaugan ni Josue nagadepende sa (paningkamot / _____ /
maayong organisasyon) – Josue 1:8.
5. Pinaagi sa (pag-ampo / pakig-away / _____ / pagtukmod)
ang pader sa Jerico natumpag – Hebreohanon 11:30.
6. Si Rahab naluwas tungod kay siya (maayo / dautan / nagbantay sa Kasugoan /
_____) – Hebreohanon 11:31.

Ang kasinatian sa mga tawo nga nagakinabuhi niining panahon sa Grasya susama sa kasinatian sa mga Israelitas sa daghang paagi. Tan-awa ang sunod nga mga Kasulatan ug isulat sa blangko.

7. Ang Israel adunay daghang gisaad nga kalibutanong mga panalangin didto sa yuta sa Canaan; ug kita adunay daghang espirituhanong mga panalangin diha _____
_____. Efeso 1:3.
8. Ang kaaway sa Israel mao ang mga nasud nga nanag-iya na sa Canaan; ug ang atong mga kaaway mao ang _____
_____. diha sa langitnong mga dapit. Efeso 6:12.
9. Ang kadaugan sa Israel nagadepende sa ilang pagtoo ug pagtuman; ang kadaugan usab nato nagadepende sa _____. Efeso 6:13-17.
10. Isulat ang Josue 1:9: _____

_____.